



FALINTIL-FDTL: Husi Militar Polítika ba Militar Profesional

Mahein Nia Lian Nú. 131, 28 Marsu 2018



Foto Fundasaun Mahein (FM)

Fundasaun Mahein (FM)
Website: www.fundasaunmahein.org

2018



Kontiudu sira

Kontiudu sira	2
Introdusaun	3
Metodolojia	3
Husi FALINTIL ba FALINTIL-FDTL	4
Militar profesional	7
Militar sira fo nia votu iha eleisaun	8
Rekomendasaun	10
Bibliografia	11



“FALINTIL-FDTL la bele tama partidu polítiku, la bele halo polítka prátika maibe sira tenke hatene polítka estadu demokratiku ninian - Xanana Gusmao, Primeiru Ministru no Ministru Defeza no Seguransa 2007 – 2015”

Introdusaun

Asuntu preokupante ida iha tempu sira ikus ne'e, diskusaun no observasaun públiku liga ho militar no polítka iha kontextu polítka atual Timor-Leste nian. Portantu asuntu sira nune'e dalaruma bele kria polêmika no sempre akontese iha nasaun hotu-hotu tantu nasaun sira ne'ebé dezenvolidu no nasaun sira ne'ebé foin dezenvolve.

Fundasaun Mahein (FM) nota katak diskusaun no observasaun sira ne'e mosu bainhira *Chefe Estado Maior General das Força Armada* (CEMGFA) - FALINTIL-*Força de Defesa de Timor-Leste* (FALINTIL-FDTL) Major General Lere Anan Timur nia deklarasaun iha media kona-bá empase polítka ne'ebé Timor-Leste hasoru. No Antes ne'e mos mosu ona resposta ida husi CEMGFA Major General Lere Anan Timur ba jornalista sira kona-bá ninia pozisaun bainhira reforma husi FALINTIL-FDTL fila ba vida sivil no involve iha partidu polítka.

CEMGFA Major General Lere Anan Timur klarefika katak deklarasaun sira ne'e nu'udar veteranu no iha obrigasaun fo nia opiniaun ba asuntu sira nasional. Katak la iha ligasaun ho pozisaun atual nu'udar ulun boot FALINTIL-FDTL nian. Maibe iha sorin seluk asume hela kna'ar nu'udar CEMGFA – FALINTIL-FDTL.

Istoriamente *Força Armada da Libertação Nacional de Timor-Leste* (FALINTIL) mai husi Partidu *Frente Revolucionario de Timor-Leste Independente* (FRETILIN) nu'udar liman kro'at FRETILIN nian hodi responde ba situasaun iha tempu ne'eba. Iha ne'ebé FALINTIL moris iha loron 20 Agustu 1975. Maibe FALINTIL hetan mudansa boot tuir evousaun funu ne'ebé Timor-Leste ultra-passa no sai ona husi FRETILIN no FALINTIL hala'o lolos deit nia kna'ar hanesan militar to'o funu ramata.

Hafoin Timor-Leste hetan fila-fali nia independensia FALINTIL transforma husi forsa girilia ida ba forsa konvensional iha tinan 2001 maka FALINTIL-FDTL. Katak militar sira hala'o nia kna'ar tuir deit Konstitusaun no lei sira. Nune'e relatóriu ida ne'e hato'o kona-bá asuntu sira militar no polítka iha kontextu Timor-Leste nian. Hahu husi FALINTIL no nia evolusaun to'o mai iha ninia transformasaun husi forsa girilia ida ba forsa konvensional. Ikus liu ho rekomendasaun sira.

Metodolojia

Fonte informasaun ka dados ba relatóriu ne'e rekolla husi dokumentu ofisial sira hanesan Konstitusaun no lei sira, diskursu ofisial sira, relatóriu dahuluk sira FM nia no opiniaun ka artigu sira liga ho asuntu militar nian. Hodi konklui relatóriu ne'e liu husi metodu ne'ebé FM adopta maka *Security Sector Discussion* (SSD).



Husi FALINTIL ba FALINTIL-FDTL

Bainhira Assembleia Konstituante aprova Konstituisaun no Timor-oan sira Restaura nia Independensia iha loron 20 Maiu 2002, iha tempu hanesan FALINTIL-FDTL mos sai formalmente representa militar Timor-Leste nian. Iha kapasidade profesional no facilidade ne'ebé limitadu tebe-tebes, Timor-Leste konsege hahu institusaun militar ida ne'ebé ho fiar ida katak sei lori interese nasional liu sasan hotu-hotu no garantia soberania Timor-Leste nian. Lia fuan hanesan mos hatutan husi primeiru Komandante FALINTIL-FDTL Major Jeneral Taur Matan Ruak, “dezenvolve forsa ida atu proteze Timor-oan husi ameasa liur, tulun ajensia governu sira no hari'i ami nia rai.”¹ Boa vontade husi Timor-Leste atu hari'i institusaun militar hetan reasaun positivu husi comunidade internasional liu husi assistensia nasaun bara-barak. Liu husi kanal bilaterais husi Portugal, Australia, Estadu Unidos, Xina, Malazia no Tailandia liu husi treinamentu rai laran no liur, fo ekipamentu, hari'i facilidade no treinamentu kona-bá ajuda lojistikuninian.²

Politikamente to'o ohin loron estrutura lider sira FALINTIL-FDTL nian sei domina husi eis membru FALINTIL sira no maioria sira hotu foin maka apriende no hetan treinamentu profesional militar iha tempu badak no depois Timor-Leste hetan independensia. Ne'e mos sai obstaklu ida ba mediu prazu ninia atu desenvolve lolos instituisaun militar ida ho independente no profesional tamba sei defisil oituan atu haketak FALINTIL no FALINTIL-FDTL. Rees espilika katak, “momentu transformasaun FALINTIL-FDTL hanesan halo lalais liu, ne'e duni defisil oituan haketak FALINTIL-FDTL husi nia abut FALINTIL, atu haketak sira bele hamosu interpertasaun negativu no bele interpreta sala ba dirasaun futuru nian.”³ Husi kestaun ne'e bele dehan katak FALINTIL-FDTL seidak hala'o nia funsaun totalmente hanesan institusaun militar profesional tamba emosionalmente no psikolojiamente membru eis FALINTIL sira sei defisil adapta no koloka sira nia-an ba regras institusaun militar. Istorია FALINTIL bele influensia hahalok no polítika FALINTIL-FDTL ninia iha kualker tempu.

Ema balun dehan katak naran organizasaun bele afeta polítika no komportamentu institusaun ninian, liu-liu mentalidade membru sira. Hipoteza ne'e mos bele akontese ba Timor-Leste nia forsa defeza nasional FALINTIL-FDTL ne'ebé sei lori naran istoriku ne'ebé adopta husi istoria funu nian, transformasaun husi FALINTIL ne'ebé husi Partidu FRETILIN ikus mai hamutuk ho CNRT. FALINTIL moris husi Partidu FRETILIN ne'ebé sai forsa libertasaun nasional wainhira Komandu Supreme FALINTIL, Kay Rala Xanana Gusmão lori sai organizasaun forsa ne'e sai husi organizasaun partidu. Iha era ukun rasik-an estadu ho governu haree ba sei iha tendensia liu uza valores istoriku FALINTIL nian hanesan referensia atu hari'i Forsa Defesa Timor-Leste. Hanesan Planu Estratejia Dezenvolvimentu Forsa Defeza

¹ Sinnadurai, C. (2005) Developing a Defence Force: F-FDTL training and development. Public Information Office, UNMISSET.

² Ibid.

³ Rees, E. (2004). Under Pressure Falintil – Força de Defesa de Timor-Leste Three Decades of Defense Force Development in Timor-Leste 1975-2004, 1-75.



Timor-Leste 2005 – 2020 ka “Planu 2020.” Iha planu estratejia ne’e hateten katak, “estadu tenke hala’o valor husi fatores identidade nasional, respeito ba simbolu sira nasional, fo prestiziu ba Forsa Defeza no halo referencia ba FALINTIL hanesan servisu ida ba nasaun, hanesan valor fundamental ida ba Defeza Nasional.”⁴ Mamburu FALINTIL-FDTL husi eis FALINTIL bele utiliza no interpreta fraze ne’e iha kontextu oin seluk. Maneira ne’e akontese ona durante kazu petisionariu iha 2006 liu husi forma se maka funu liu, se maka lae, iha instituisaun laran.

Iha parte seluk, eis FALINTIL ida agora hela iha Santa Cruz, Dili, Timor-Leste afirma katak ita labele nega, FALINTIL-FDTL ne’e iha tamba FALINTIL no instituisaun militar Timor-Leste nia hahalok bele iha impaktu husi naran istoriku ninia.⁵ Ekspresaun ne’e mos hamosu dúvidas oituan ba povu sira tamba mentalidade veteranismu bele mosu liu husi historia atu influencia profesionalidade instituisaun militar. Iha 1987 to’o 1988 Xanana Gusmão deklara reorganizaun FALINTIL hanesan liman kro’at povu nia, hamarik hanesan defeza ba rezistencia la inlkina ba interese politika ida.⁶ Deklarasaun istoriku ne’e lolos kaer metin hanesan prinsipiu ba FALINTIL-FDTL iha era independensia. Iha prinsipiu, estadu ho governu tuir lolos foti loron ida ne’e sai hanesan aniversariu ba FALINTIL-FDTL, nune’e labele iha tendensia liu uza historia partidu nia. Iha aspeitu balun ema bele kompreinde tamba historia Timor-Leste oin seluk oituan, hanesan husi sistema gerileiru Timor-Leste atu forma instituisaun militar profesional. Funsionariu ida husi Ministériu Defeza Timor-Leste afirma katak la’os fasil atu reorganiza gerileiru sira ne’ebé uluk la uza leis no disiplina atu sai hanesan forsa profesional iha fase ukun rasik a’an, prosesu ne’e so iha Timor-Leste maka bele akontese.”⁷

Maibe, bele iha pergunta mosu hanesan ne’e, se FALINTIL-FDTL selebra nia aniversariu husi organizaun ne’e moris, ema balun bele dehan katak FRETILIN maka parese iha direitu liu atu selebra hamutuk ho instituisaun militar ne’e. Tanba lojikamente Timor-Leste selebra loron aniversariu independensia dala rua, hanesan husi 28 Novembru 1975 no 20 Maiu 2002. Iha hahalok ida nee, FALINTIL-FDTL mos iha possibilidade atu selebra nia aniversariu dala rua (2), liu-liu loron transformasaun instituisaun militar, se lae FALINTIL-FDTL sei iha valores partidu ninia sei metin hela. “see loron independensia mos iha restaurasaun, FALINTIL-FDTL mos persiza iha restaurasaun ba sira nia loron transformasaun.”⁸ Purtantu iha parte ida Timor-Leste sei iha problema ida atu hatur lolos naran no pozisaun FALINTIL-FDTL iha kontextu ba paradigma foun no independensia kona-bá forsa defeza nasional. Iha parte seluk, atitude veteranismu sei maka’as iha aspetu polítika Timor-Leste ninia ne’ebé bele fo influencia maka’as mos iha prosesu dezvoltamentu FALINTIL-FDTL nia. “kna’ar veteranu sira domina polítika nasaun ninia husi suku sira to’o kapital.”⁹ Ida ne’e

⁴ Ministry of Defence of Timor-Leste. (20 Julhu 2006). Defence 2020: Strategy Blueprint for the development of the armed forces of Timor-Leste 2005 – 2020.

⁵ Entrevista Fundasaun Mahein, iha loron 3 Setembru 2010.

⁶ Niner, S. (Ed.). (2000). *To Resist is to Win!: The autobiography of Xanana Gusmão*. Aurora Books, Victoria, Australia.

⁷ Entrevista Fundasaun Mahein iha loron 5 Setembru 2010.

⁸ Entrevista Fundasaun Mahein iha loron 2 Setembru 2010.

⁹ Rees, E. (2004). Under Pressure Falintil – Força de Defesa de Timor-Leste Three Decades



asuntu boot ida persiza haree no istuda didiak nune'e labele iha embriu veteranismu moris iha institusaun militar iha future no persiza halo avaliasaun profundu atu nune'e bele hetan konseitu foun lori sai FALINTIL-FDTL husi paradigma uluk ninian.

Iha pontu seluk, membru veteranus balun seidauk totalmente muda sira nia hanoin wainhira sai membru FALINTIL-FDTL, liu-liu eis membru FALINTIL sira. Emosionalmente membrus veteranus FALINTIL balun seidauk kompletamenta sai husi memoria ida ne'ebé hakesi no hahoris sira, hanesan Partidu FRETILIN no sira nia komadante supreme durante hamutuk ho sira iha ailaran durante okupasaun Indonézia. FALINTIL-FDTL seidauk iha lolos komandu orientasaun ida no institusionalmente seidauk la'ó diak tamba sei iha mentalidade fiar no rona liu ba lideransa hanesan Ramos Horta ho Xanana Gusmão."¹⁰ Situasaun ida ne'e la'os fasil atu direktamente ilimina husi hanoin membrus veteranus sira maibe sira mos persiza iha hanoin ida katak naran FALINTIL-FDTL labele hamosu superidade no diskriminasaun entre membru veteranus ho membru sira seluk. Institusaun militar nasional hamarik iha povu nia leet, povu no elite polítiku sira maka iha poder liu atu fo kritikas no dezenvolve liu husi sira nia mandatu iha parlamentu.

Iha realidade, eis FALINTIL sei hetan fatin importante iha FALINTIL-FDTL no sei politikamente defisil oituan atu troka sira lalais husi estrutura militar nia. Membru militar sira mos seidauk iha fiar ida ba jersaun foun atu kaer pozisaun a'as militar ninia ba tempu badak. Lia fuan hirak ne'e mos hato'o husi jersaun foun, Kapitaun FALINTIL-FDTL ida ne'ebé lakohi atu temi nia naran iha ne'e katak bazeia ba situasaun Timor-Leste ami sei presiza jersaun tuan sira (eis FALINTIL) maka kaer FALINTIL-FDTL tamba to'o agora sira deit maka membru militar fiar no hametin institusaun. Bele troka sira wainhira ami profesionalmente no institusionalmente bele ona atu troka sira nia fatin. Nia hatutan tan katak sira henesan General Taur Matan Ruak so bele troka iha 2017, nee hanesan tempu ida ami bele atu foti estafeta lideransa husi sira.¹¹ Ne'e duni husi lian fuan entrevista ne'e, bele foti konkluzaun ida katak figura eis FALINTIL sira iha FALINTIL-FDTL sei hetan fatin espesial. Institusionalmente, regras no politika militar seidauk implementa diak iha institusaun militar Timor-Leste tanba veteranismu sei iha influensia maka'as. Ne'e duni FALINTIL-FDTL seidauk bele hamrik hanesan institusaun militar profesional ne'ebé demokratikamente kontrola husi sosiedade sivil tamba institusaun militar ne'e kontrola husi veteranu sira iha institusaun militar, estadu no guvernun.

of Defense Force Development in Timor-Leste 1975-2004, 1-75.

¹⁰ Simonsen, S. G. (2010). Second Division: Police-Military Tensions Remains in Timor-Leste, 1-5.

¹¹ Entrevista iha loraun kuarta, 1 setembro 2010.



Militar profesional

FALINITIL-FDTL tenke iha prinsipiu no komitmentu maka'as atu kontra intervensaun husi partidu politiku, governu no organizasaun seluk-seluk husi liur. Tuir lei inan Timor-Leste hateten katak FALINTIL-FDTL la iha dalan atu tuir partidu politiku, rona deit institusaun soberanu kompetente no intervensaun area poliitika sivil ninian.¹² Doutrina no komportamentu militar tenke hakesi-an ba konstitusaun no lei organiku militar ninia.

Krize 2006 hatudu ba Timor-oan no komunidadade internasional katak Timor-Leste presiza haree fila-fali kna'ar militar nia iha kontektu nasaun ida demokratiku. Institusaun FALINTIL-FDTL presiza hatuur ona paradigma foun atu estabelese funsaun no abjetivu forsa defeza nasional bazeia ba prinsipiu imparcialidade. Iha rai demokratiku bara-barak, militar sai hanesan forsa ida atu hametin no implementa unidade nasional ne'ebé refleta interese komun bazeia ba konstitusaun. Membru militar tenke hatene sira nia kna'ar hanesan forsa tuir juramentu militar atu servi nasaun. Militar nia abut sai husi povu ne'e duni tenke fo poder maximu ba povu atu kontrola sistema militar. Timor-Leste presiza iha tempu badak fo kna'ar militar ba sivil atu kontrola.¹³ Estadu no governu ne'ebé kaer papel politika militar nia iha tempu badak presiza gradualmente fo kna'ar militar ba sivil atu kontrola. Se Timor-Leste hakarak sai rai demokratiku presiza haree ba institusaun militar hanesan elementu imparcialidade ida ba prosesu dezvoltamentu, signifika katak ho prezensa militar povu sente seguru demokratikamente.

Iha sorin seluk, nasaun ida bainhira dehan demokratiku lolos, iha ne'ebé poliitika ida ne'ebé livre husi intervensaun sira militar nian. Nune'e mos ejijensia husi prosesu poliitika ida ne'ebé demokratiku no livre husi intervensaun sira militar nian, bainhira hatuur lolos pozisaun militar nian. Inklui militar mos labele hetan pozisaun ne'ebé forte hanesan guardiaun ba rejime ida nia estabilidade, tamba fasil tebes utiliza sala sira nia funsaun husi ninia elementu sira. Ho lian seluk, militar ne'ebé nia papel boot iha poliitika ninia tendensia hanesan ditador no personalismu poliitika. Tamba poliitika la'os asuntu sira militar nian, maibe poliitika la sees husi asuntu sira poliitika militar hanesan poliitika sira kona-bá seguransa nasional. Ho ida ne'e militar sira iha dever hala'o deit kna'ar sira seguransa nasional tuir desizaun sira ne'ebé determina ona husi poliitiku sira.

Matenek na'in Almos Perlmutter hatete motivu sira ne'ebé militar halo intervensaun konkreta maka poliitika, no kondisaun sosial sira ne'ebé la institucionaliza. Primeiru, kondisaun sosial, nasaun ida nia kondisaun sosial fraku nune'e interese grupu ne'ebé habelar iha frekuensia ne'ebé ás. No estrutura estadu nia fraku implika ba institusaun poliitika sira la funsiona ho efetivu no kontrolu sosial ne'ebé la efetivu no resulta militar iha oportunidade halo ninia intervensaun. Segundu, kondisaun poliitika,

¹² Numeru 3, Artigu 146. Konstituisaun Republika Demokratika Timor-Leste.

¹³ Rees, E. (2004). Under Pressure Falintil – Força de Defesa de Timor-Leste Three Decades of Defense Force Development in Timor-Leste 1975-2004, 1-75.



intervensaun militar mosu husi asuntu sira sivil. Iha kazu barak sivil sira ho suporta militar nian bainhira estrutura polítika fragmentadu iha faksaun sira polítika no aparelu konstitusaun nia la la'o.

Nune'e mos matenek na'in Eric A. Nodlinger mos haree katak possibilidade sira ne'ebé ofisiais militar sira hala'o nia papel iha polítika iha kategoria tolu maka moderador, gurdiaun no rullers. Militar ho nia karater moderador bainhira relasaun sivil-militar ne'ebe "fluidas". Asuntu polítika no governasaun kaer husi sivil maibe nia patraun ka *back-up* husi militar sira. Gurdiaun, militar nia papel hanesan gurdiaun no kontrolu ba lalaok governasaun nian. Involvimentu militar nian iha polítika, iha asuntu sira makro-estratéjiku. Rullers maka situasaun ne'ebé militar sira domina iha asuntu hotu-hotu estadu nian liu-liu polítika, iha kontestu ida ne'e maka hamosu rejime militar ida.

Tamba ne'e ajenda demokratizasaun importante tebes no esforsu hodi limite no halakon papel militar nian iha responsabilidade sira sosial no polítika. Signifika katak militar tenke hala'o lolos ninia funsaun ho profesionalismu.

Militar sira fo nia votu iha Eleisaun

Asuntu militar sira fo nia direitu votu iha eleisaun, asuntu ida ne'ebé pro-kontra iha sociedade Timor-Leste katak FALINTIL-FDTL la bele tuir eleisaun ka vota tamba preve iha Konstitusaun Repúblika bandu forsa defeza no seguransa la bele partisipa iha polítika".¹⁴ Nune'e mos opiniaun seluk mos katak tuir eleisaun ka vota nu'udar direitu sidadaun ida nian.¹⁵ Iha tinan 2012 Sekretariu Estadu Defeza Julio Tomas Pinto hato'o ona katak FALINTIL-FDTL nu'udar sidadaun, sira bele ezerse sira nia direitu ba vota iha eleisaun no lei kondena wainhira uza farda ba vota. Tamba ko'alia kona-bá votasaun hau la'os ko'alia kona-bá partisipasaun polítika pratika, nu'udar sidadaun sivil, sira partisipa. Maibe, nu'udar militar, sira la bele tuir tamba Konstituisaun bandu."¹⁶

Intrevista balu ne'ebé sita ona iha relatóriu dahuluk FM nian katak iha opiniaun ne'ebé diferente husi públiku kona-bá membru FALINTIL-FDTL sira nian partisipasaun iha eleisaun hodi ezerse sira nia direitu votu. Iha ne'ebé hato'o katak membru FALINTIL-FDTL la bele vota tamba sira vota signifika sira la neutru ona tamba hakarak ka lakohi eskolla partidu ida ka kandidatu ruma. Portantu eleisaun iha Timor-Leste hanesan "futu manu" no nia rezultadu manan ka lakon, nune'e bainhira membru FALINTIL-FDTL vota sira sei suporta ka vota ba partidu polítiku sira no partidu ne'e lakon signifika sira mos lakon. Tamba eleisaun iha Timor-Leste eleisaun emosional ema sei iha relasaun emosional ho partidu polítiku tamba Timor-Leste nia istoria rasik no relasaun emosional ho líder sira.

¹⁴ Haree mos Konstituisaun Repúblika artigu 146 no 147.

¹⁵ Haree mos Konstituisaun Repúblika artigu 46 no 47.

¹⁶ Notisia Jornal Suara Timor Lorosa'e (STL), Edisaun 06 Outobru 2011. Sita mos iha relatóriu Fundasaun Mahein (FM), 2012. Militar ho Polisia Tuir Eleisaun ka Lae? Disponivel iha ne'e: <http://www.fundasaunmahein.org/wp-content/uploads/2012/01/MNL-no-29-31012012-F-FDTL-PNTL.pdf>. Asesu iha loraun 02 Agustu 2016.



Opiniaun seluk hato'o katak membru FALINTIL-FDTL no PNTL bele vota tamba nu'udar sidadaun hodi ezerse ninia direitu votu. Direitu votu la signifika involve ka partisipa iha atividade partidária ka polítika prátika. Nune'e bainhira sira la vota iha eleisaun signifika sira lakon direitu votu hanesan sidadaun. Maske sira nia lei bandu kona-bá involvimentu ka partisipa iha polítika.

Intrevista ida ho Manuel Tilman hanesan advogadu Timor-oan ida kuiñesidu no hanesan mos líder partidu polítiku ida hato'o katak:

'Membru FALINTIL-FDTL no PNTL bele vota tamba sira hanesan sidadaun hodi ezerse sira nia direitu no ida ne'e Konstitusaun garante katak soberania iha povu nia liman no ezerse soberania nu'udar Konstitusaun haruka. Direitu sira nune'e reforsa liu-tan husi Konstitusaun artigu 6 katak estadu defende no garante pais nia soberania, garante no promove direitu fundamental sira povu nian no garante demokrasia polítika no povu nia partisipasaun iha solusaun ba problema nasional. Nune'e mos artigu 7 Konstitusaun nian kona-bá povu ezerse poder polítiku ho sufrájiu universál, livre, iguál, diretu, sekretu no periódiku no ho meu sira-seluk ne'ebé Konstitusaun prevee. Reforsa liu-tan husi Konstitusaun artigu 46 no 47'.¹⁷

Argumentu ne'ebé hanesan hato'o husi Adjuntu Provedor Direitus Umanus no Justisa (PDHJ) Horacio de Almeida hatete:

'Membru husi FALINTIL-FDTL no PNTL bele vota tamba ne'e nu'udar direitu sidadaun nian no konstitusaun garante. Bainhira membru FALINTIL-FDTL no PNTL la vota sira sei lakon sira nia direitu hanesan sidadaun. Maske Konstitusaun artigu 146 no 147 no lei organika FALINTIL-FDTL no PNTL bandu sira labele partisipa atividade sira ho karater polítiku maibe lei ne'e rasik lahatete klaru kona-bá labele vota'.¹⁸

Argumentu sira iha leten ne'e presiza klarefika tuir lei nia haruka. Iha ne'ebé artigu balu husi Konstitusaun no lei-oan sira bandu labele partisipa direita ka indireita iha polítika maibe artigu seluk autoriza bele partisipa hanesan sidadaun. Tuir lejislasaun sira ba Forsa Armada hatete FALINTIL-FDTL labele iha partidu polítiku no tenke obedese ba órgaun soberanu kompetente sira, nu'udar Konstitusaun no lei, no labele iha intervensaun polítika naran ida'.¹⁹ Nune'e mos regulariza espesifikamente iha sira nia lei organika. Ba FALINTIL-FDTL nia lei organika rasik defini katak FALINTIL-FDTL rigorozamente apartidária no ninia organizaun mesak ida de'it ba nasaun tomak. Elementu FALINTIL-FDTL nian, iha kualkér grau ka kategoria, labele partisipa direta ka indireta iha atividade polítika sira'.²⁰ Nune'e mos utilizaun uniforme iha tempu eleisaun ka votasaun bandu labele utiliza ka hatais uniforme iha atividade sira nia karatér polítiku, eleitoral ka partidariu.²¹

¹⁷ Intervista ho Dr. Manuel Tilman, loron 30 Agustu 2016

¹⁸ Intervista ho Adjuntu Provedor Direitus Umanus no Justisa (PDHJ) Horacio de Almeida, loron 26 Agustu 2016

¹⁹ Konstitusaun RDTL artigu 146

²⁰ DEKRETU-LEI NO. 15/2006. Estatuto Orgániku FALINTIL-FDTL nian. Artigu 1, N° 2 no 3.

²¹ Decreto do Governo N° 7/2012 de 1 de Agosto. Regulamento de Uniformes das FALINTIL-



Rekomendasaun

1. Rekomenda ba Orgaun Soberania sira hanesan Prezidencia Repúblika, Parlamentu Nasional no Governu kontinua fortifika kontrolu ne'ebé objetiva no rigorozu.
2. Rekomenda ba FALINTIL-FDTL hala'o nia kna'ar nu'udar institusaun militar ida profesional tuir termu sira husi Konstitusaun no lei sira, no hakruk deit ba determinasaun sira husi poder polítiku ne'ebé eleitu demokratikamente.



Bibliografia

- Decreto do Governo N° 7/2012 de 1 de Agosto. Regulamento de Uniformes das FALINTIL-Força de Defesa de Timor-Leste (RU/F-FDTL).
- DEKRETU-LEI NO. 15/2006. Estatuto Orgániku FALINTIL-FDTL nian.
- Fundasaun Mahein (21 Novembru 2016). Lalatak Konflitu iha Eleisaun Jeral 2017.
- Fundasaun Mahein ((2012). Militar ho Polisia Tuir Eleisaun ka Lae? Disponivel iha ne'e: <http://www.fundasaunmahein.org/wp-content/uploads/2012/01/MNL-no-29-31012012-F-FDTL-PNTL.pdf>.
- Fundasaun Mahein (28 Outobru 2010) Kna'ar F-Forsa Defesa Timor-Leste (F-FDTL) iha Faze Ukun Rasik A'an husi 2002 to'o 2010.
- Ministry of Defence of Timor-Leste.(20 Julhu 2006). Defence 2020: Strategy Blueprint for the development of the armed forces of Timor-Leste 2005 – 2020.
- Niner, S. (Ed.). (2000). *To Resist is to Win!: The authobiograpy of Xanana Gusmão*. Aurora Books, Victoria, Australia.
- Simonsen, S. G. (2010). Second Division: Police-Military Tensions Remains in Timor-Leste, 1-5.
- Rees, E. (2004). Under Pressure Falintil – Força de Defesa de Timor-Leste Three Decades of Defense Force Development in Timor-Leste 1975-2004, 1-75.
- Sinnadurai, C. (2005) Developing a Defence Force: F-FDTL training and development. Public Information Office, UNMISSET.